

【學泅水】徐姿華原作

佢一旦就當驚水，小學一年生該下，先生鼓勵大家學泅水，講泅水係當好个運動，身邊个好同學做下學會泅水哩，硬性个佢乜毋願輸人，轉去屋下就緊嚟<sup>1</sup>阿媽講愛去學泅水。趕等暑假，阿媽同佢尋著一間溫水个游泳池，還問著名聲盡好个教練來教佢，過買一身靚靚个連身游泳衫分佢，鼓勵佢勇敢學泅水。

第一到去到游泳池，又驚又好。做好軟身運動，教練帶佢同另外四個學生仔練習沒水、學換氣，同佢兜一個一個拗入游泳池。佢兜乖乖聽教練个指示，同頭那沉<sup>2</sup>入水裡肚，佢嚇到胚命仔扳等游泳池脣、腳趔趔仔毋敢沾著水、抽筋另命、噉到目流鼻涕，像分人苦毒到當衰過樣仔；脣項个人做下緊看佢緊笑，教練緊拐佢，佢還係噉到抽筋、毋肯落水，高不將正喊阿媽同佢帶轉去。

該暗晡，阿爸軟聲勸話佢繼續去學泅水；阿媽就唉唉唧唧道嘆：「你毋去上課，學費就了忒哩，無好退！」阿哥也分享自家學泅水个經驗，還拿出佢盡愛惜个極樂仔講愛做佢學會泅水个獎

品。在大家个鼓勵之下，佢答應第二日愛過去上游泳課。

第二日朝晨，阿媽愛載佢去上游泳課，催了催佢還係啊啊奶奶<sup>3</sup>、這摸該摸毋肯停動。上課時間硬硬會赴毋著咧，阿媽發譴擎雞毛掃仔<sup>4</sup>愛修理佢，佢試著當委屈，又驚分阿媽打又驚去泅水，就噉到大嬲聲，歸條巷仔都聽到清清楚楚。鄰舍過來關心，知著佢係驚泅水正噉到恁大聲，做下忍等笑來鼓勵佢。就恁仔，該站時間，朝晨頭巷頭巷尾若係聽著佢又噉到噉噉滾<sup>5</sup>，就知該日佢又愛去上游泳課咧。

經過三禮拜个訓練，游泳課个同學一儕儕都學會泅也，同學一陣換了一陣，佢還係手同腳配合毋著，手記得划咧腳又毋記得踢，實在毋得結煞。有一日，佢自家在該練習，毋多知仔手同腳噉配合得著哩，泅有五公尺恁遠，心肝肚實在還歡喜哪！佢續等過練，緊練緊知得該要領，手腳較省力哩，圓身也緊來緊輕鬆，佢正第一擺感受著泅水个趣味。

感謝該當時，屋下人个鼓勵，分驚水个佢面對自家个困難去學泅水，分佢有機會去克服自家較軟弱个所在，這下个佢，毋單淨曉得泅水哩，也有信心去面对人生个各種挑戰。

<sup>1</sup> 嚟：音 kieuˋ；小孩子對大人有所要求的聲音或動作。

<sup>2</sup> 沉：音 ciim；因外力所致而被推入、沒入水中。

<sup>3</sup> 啊啊奶奶：音 aˊ aˊ naiˊ naiˊ；懶懶散散、愛理不理的樣子。

<sup>4</sup> 雞毛掃仔：音 gieˊ moˊ so eˊ；雞毛撻子。

<sup>5</sup> 噉噉滾：音 ve ve gunˋ；不斷的大叫或大哭。